



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym TAPAK 7

PM Modi-i Japan densema linük
asem semdangtsü apusoa ogo

G7 senden nung shilem
agitsü Zelensky Japan-i aotsü



VOL. XX NO. 217 (ADOK 217)

DIMAPUR

KÜPTOKNÜ (SATURDAY)

MONUPII (MAY) 20, 2023

₹ 5.00

RBI-i Rs 2,000 banknotes agiener

New Delhi, May 19, 2023 (Agencies): Reserve Bank of India (RBI)-i Rs 2,000 banknotes agientsü telemetba agiogo ajisüaika legal tender ama maneni amshitsü.

Hokolbarnü RBI-i bank tem dang Rs 2,000 denomination banknotes magütsütsü tetuyuba agütsüogo.

September 30, 2023 matongdang Rs 2,000 currency notes ajak melenadoktsüla ta parnokisa ashi.

"Public-i Rs 2,000 sen melentsü atema mapang peria agütsütsüla aser bank-i September 30, 2023 tashi nung deposit/exchange facilities agütsütsüla" ta RBI-i ashi.

Bank kongsang balala nung timtem sen melendang timtem majurutsü atema May 23, 2023 nungi Rs 2,000 notes khen nung Rs 20,000 tashi melentetsü ta parnokisa metetdaksü.

Prime Minister Narendra Modi-i November 2016 nung Rs 1,000 aser Rs 500 banknotes tejenba demonetization asütsü metetdaksüba sülen nungi Rs

2,000 currency note amshitsü tenzüka liasü.

Tanga denominations peria akümba sülen 2018-19 nungi Rs 2,000 banknotes menünga anena liasü. March 2017 matongdang Rs 2000 denomination banknotes 89% tashi menüng aser küm 4-5 life-span tatemleni arur ta RBI-i ashi.

March 31, 2018 tashi nung Rs 2000 banknotes Rs 6.73 lakh crore (37.3% of Notes in Circulation) tashi amshia liasü saka March 31, 2023 tashi nung Rs 3.62 lakh crore (10.8% of Notes in Circulation) ajema aküm. Reprangdanga aru nung Rs 2000 banknotes ya kanga mamshir aser ibaji dang masü saka public-i nüngdakba ama tanga denomination indang banknotes peria dang lir, ta RBI-isa metetdaksü.

Iba nung ajemdaker Reserve Bank of India indang "Clean Note Policy" sülen anidaka Rs 2000 denomination banknotes agientsü telemetba agiogo ta parnokisa ashi.

DDCF-i lenmang, street lights aser traffic tebilemetsü abener

Dimapur, May 19, 2023 (TYO): May 13, 2023 nü Dimapur District Citizens' Forum (DDCF) indang mezüingbuba Executive Meeting 2023 menogo.

Sendenji Hotel Saramati, Dimapur nung amen aser Ao Senso Telongjem Dimapur (ASTD)-i host asüba atema pelar ta Media Cell, DDCF-i sangdong ka nung ashi.

Dimapur nung traffic timtem aser gari lenmang aika mejungi akümba indang senden nung benoka lemsatop.

Idangji parnokisi GS Road ajanga DC junction nungi Kalibari

Road aser Tragopan junction ajanga Dillai Gate nungi Station road ya kanga dang tongtipang lenmangtem lir saka kanga mejungi aliba indang jembu.

Ano, Dimapur nung alirtemi Street Light fee agütsür saka yimdong nung street lights shitak enoka mali ta parnokisa tebilemba lemsatop.

Tzüngluruwa matongdang bangdakpurtemi tongtipang gari lenmangtem yanglutsü, street lights enoktsü aser Dimapur yimti nung traffic khuret ajema kümdaktsütsü ayongzüker ta DDCF-i metetdaksüogo.

Manipur osangbenertemi Internet lapoktsü mepishir

Imphal, May 19, 2023 (Agencies): Manipur nung kin o kin tsüingda mepetmesü adoka raraba sülen hopta asem tashi internet shibangba melapoker aser iba ajanga nübertem den media nisungtem kanga timtemer.

Brihostibarnü All Manipur Working Journalists Union (AMWJU) aser Editors Guild Manipur (EGM)-i Information and Public Relations minister ajanga chief minister N Biren Singh dang internet shibanga aliba lapoktsü shidi ka zülüogo.

Bangdakpurtemi Manipur nung media house tem atema internet connectivity lapokjang kechiyong iba ajanga print aser electronic media atema timtem ajurur, ta AMWJU aser EGM-i zülüba shidi nung shia lir.

Ano Manipur nung National Highways mokdangba ajanga print media houses-i newsprint aser printing osettem bener maruteter anungji state sorkari

item khuret atema mapa inyaktsü mepishir ta parnokisa ashi.

Senapati district kübok Mao nung newsprint oset abenba truck gari aika anendaka lir ta parnokisa metetdaksü.

Directorate of Information and Public Relations (DIPR) aser Manipur Press Club nung internet service lir anungji Manipur nung media fraternity-i Chief Minister dang Internet ban nung Internet ban aliba agientsü akhanger, ta AMWJU aser EGM-isa shiogo.

"Sorkari Internet connectivity magütsüra onoki mapa meinyaktsü aser iba ajanga public-i osang kecha mengui akümtsü. Iba lemet atema sasaa bilemer saka iba sorkaria kasa tebilemetsü khuret abentsüla" ta parnokisa ashi.

Manipur nung May 3, 2023 nü mobile data service khen atema shibang aser May 4 nungi broadband connection aser tanga Internet services shibanga liasü.

2024 LS election atema Nagaland nem EVMs, VVPATs agütsüogo

Dimapur, May 19, 2023 (TYO): 2024 Lok Sabha elections nung amshitsü atema Nagaland nung polling stations 2315 atema EVMs aser VVPATs agütsüogo ta Election Commission of India-i Hokolbarnü metetdaksü.

Nagaland nung Electronic Corporation of India Limited (ECIL) Hyderabad ajanga yangluba M3 model EVMs aser VVPATs amshitsü ta ECI-i ashi.

Nagaland nem 3945 ballot units

(BU), 4736 control units (CU) aser 4252 VVPATs agütsüogo. Iba nungi 550 BUs, 1450 CUs aser 900 VVPATs tasen lir.

Tanüingba EVMs aser VVPATs ji February 2023 state assembly election nung amshibatem lir, ta ECI-isa ashi.

EVMs aser VVPATs tasentem nungi 250 BUs, 1150 CU aser 600 VVPATs tashi district balala tongogo. Tanüingba BUs, CUs aser VVPATs ji June 2023 tashi nung

ECIL Hyderabad nungi agizüktsü atema maparen inyakogo, ta ECI-isa metetdaksü.

2024 Lok Sabha elections atema Nagaland chief electoral officer-i taküm September nung first-level checking (FLC) of EVMs and VVPATs indang workshop agitsü sentong renemogo.

October nung EVMs aser VVPATs indang authorised engineers ajanga first-level checking (FLC) agitsü.

Assam nung Deputy Commissioner nungja melener

Guwahati, May 19, 2023 (Agencies): Assam sorkari Hokolbarnü Deputy Commissioner (DC) nungja District Commissioner ta melenogo.

May 19, 2023 nü Assam cabinet senden nung District Commissioner (DC) tenüng melen. Tang nungi District Commissioner temi pei pei district nung gazetted aser non-gazetted ketdangsurtem transfer asütsü tashi angutsü.

'DC' ta asübabo kasa dang alitsü saka tenüng tasenba ajanga mapa teinyaktsü tuluba sayur ta Minister Pijush Hazarika-i osangbener dang ashi.

Ajisüaika bangdak minister

dang nungi temelaba meshir ang gazetted ketdangsur transfer asütsü akok. Maneni, Divisional Commissioner indang office agientsü aser iba tashiji Principal Secretary, GAD ajanga abentsü.

District shia nung Office of Divisional Commissioner nung inyakertem aser oset ajak pei pei district commissioner (DC) office-i belentsü.

Taoba mapang Assam CM Himanta Biswa Sarma-i deputy commissioner kati administrative mapa nung masü saka district renloktsü atema mapang endoktsüla ta shia liasü.

"DC tem ya district nung chief secretary ka ama inyaktsüla aser terenlokba maparen atema

temulung agütsütsüla" ta CM Sarma-isa shia liasü.

Assam sorkarisa assembly constituency shia revenue circle ka den dang sendakteptsü telemetba agiogo.

Tang Assam nung assembly constituency tem ya district headquarters den sendaktepa lir aser district ka nung circles aser constituencies aika lir.

"Tang nungi constituency shia nung ketdangsubaren tajungba akümtsü atema revenue circle ka den sendakteptsü" ta Assam CM Himanta Biswa Sarma-i metetdaksü.

"Iba ya revenue aser developmental works tipatemtsü atema lir" ta paisa ashi.

Minister Paiwang-i World Bank dang maneni Nagaland yaritsü mepishi

Dimapur, May 19, 2023 (TYO): Health & Family Welfare Minister P. Paiwang Konyak aser Commissioner & Secretary Y. Kikheto Sema nati Hokolbarnü New Delhi nung Country Director, World Bank Auguste Tano Kouame den ajurutepogo.

"World Bank-i Nagaland pusema nungitba aser talisa health sector yariba ajanga NHP takok ngua inyakogo. Centre sorkari schemes balala kübok senotsü agütsüba ya lemteta aliba mapatem inyaktsü atema dang lir saka NHP senotsü ajanga tapok aika tangogo" ta Minister Paiwang-i Auguste dang ashi.

"Health ya kanga dang tongtipang tebilemetsü ka lir aser küm ka mesüra ana nung mekoktettsü. Anungji Externally Aided Projects indang senotsü aser teyari maneni aginür" ta paisa ashi.

"World Bank-i Nagaland nung Health, Education and Agriculture & Allied activities sectors nung teyari agütsüba atema kanga pelar" ta Kikheto Sema-ia ashi.

Nagaland Health System Strengthening Project (NHSSP) ta ser mapatong tasen ya Health Centers indang infrastructures nung mapa inyaktsüba lir aser iba nung health workers indang Quarters yanglutsü dena lir, ta pai ashi.

State sorkari senso ajak nem health care dalang aser tajung agütsünür saka infrastructure facilities tajung melira ibaji meinyaktetsü. Anungji World Bank-i maneni teyari agütsütsü mepishir ta Kikheto-isa metetdaksü.

Nagaland Health Project takok ngua inyakba atema tenüngsang agütsür ta Auguste Tano Kouame-i ashi.

"Ni tawa nungi ang Country Director inyaktsü tenzüker aser NHP takok ngua inyakba osang angazükogo. Iba atema Government of Nagaland, Department of Health & Family Welfare dang pelar. NHP takok ngua inyakba ajanga Bank-i maneni NHSSP mapatong pusema nungitba aser iba osang India sorkar dangi abentsü" ta pai metetdaksü.

"NHSSP mapatong ajaga state sorkari senotsü angutsü, PPP mode ajanga private sector ajungmesotsü aser pre-service training ajanga mapa adokdaksütsü akok" ta Auguste-isa ashi.

Paisa Nagaland Health Project indang inyakyim tajungtem World Bank-i teyari agütsüba tanga state aser linüktem den virtual meetings ajanga lemsatop junger ta paisa tebilemba ka shidang.

SC-i Nagaland sorkar dang ozüng sülen anidaktsü ashi

New Delhi, May 19, 2023 (Agencies): Supreme Court-i urban local bodies election indang ken o angadang Nagaland sorkar dang linük nung ozüng sülen anidaktsü metetdaksü.

Nagaland Assembly-i Municipal Act agientsü bangzüng ka renemba aser urban local bodies indang elections magitsü lemtetba atema mepelar ta

Supreme Court-i ashi.

SC nung justice S K Kaul aser justice A Amanullah nati akümba bench kati Nagaland nung tetsür nem 33% lezmükja urban local bodies elections indang ken o angar.

March 30, 2023 nü Nagaland sorkari urban local bodies election magitsü indang sangdong agütsü saka Supreme Court-i April 5 nü

iba sangdong sota ayu.

Urban local bodies nung tetsürtemi shilem melemzüktsüsa customary law kar lira ibaji unconstitutional ta sangdongtsü ta SC-i Brihostibarnü Nagaland sorkar dang ashi.

India aser Nagaland sorkar temi taküm July ita tashi nung iba onük lemtetsü mapang agütsür ta Constitution bench-isa ashi.

24 Angetyongpang AC NDPP-i JCB Excavator aser Ambulance ajanga nübur yaritsü



24 Angetyongpang Assembly Constituency nung NDPP party ajanga Angetyongpang nübur yaritsü asoshi JCB Excavator aser Ambulance meshitetba sentong May 19, 2023 nü agir Advisor, Water Resources, Govt. of Nagaland, Tongpang Ozükum aser lenirtem tangokba noksa ka yangi angur.

Mokokchung, Monupii/May 19 (TYO): Tanü 24 Angetyongpang Assembly Constituency nung NDPP ajanga Angetyongpang nübur yaritsü asoshi JCB Excavator aser Ambulance meshitetba sentong Mokokchung nung 24 Angetyongpang AC indang MLA aser Advisor, Water Resources, Govt. of Nagaland, Tongpang Ozükum-er kidang kaogo.

Tanü JCB Excavator aser Ambulance meshitetba sentong Advisor Tongpang Ozükum-i jembidang, JCB Excavator aser Ambulance amshia nüburtem, talisa Angetyongpang nüburtem yaritsü asoshi mapang talangka nungi bilema liasü saka election aruadokba ajanga meinyakteti aliba asangsang nung ataloker,

ta ashi. Advisor Tongpang Ozükum-isa pa Angetyongpang MLA süaka 24 Angetyongpang AC-ji Angetyongpang nüburtem ajak kibur lir, anungji kibur ka ama iba JCB Excavator aser Ambulance amshiba ajanga Angetyongpang nüburtem dang masü saka nungtakba nübur ajak temolung süa yariteta tejak tentetsüsa inyakdaksüner, ta ayongzük.

Iba sentong nung Tsüingrem temoatsü jazüka 24 AC NDPP Woman Org. tir, T. Anungla-i sarasadem aser 24 AC NDPP tatong tir Dr. Imtinungba aser Alempang Ward Chairman Limasashi nungeria shilem agia jembiba den Ambulance achayanga amshitsü pur Rangro Longjem Society Alempang Ward nungi züngsem kati jembia

liasü. Iba den JCB Excavator aser Ambulance meshiteta Chuchu Town Baptist Arogo nungi pastor Rev. Temjen-i sarasadem aser 24 AC NDPP tir Nungshimayang ketdangsuba nung iba sentong agia liasü.

24 Angetyongpang Assembly Constituency meyong JCB Excavator ya 24 Angetyongpang AC nung molung lemtet telok kati achayanga amshitsü aser Ambulance ya Alempang Ward nung aliba Rangro Longjem Society-i achayanga amshitsü.

Mezüngbuba nung 24 AC pur nem maangka agütsütsü aser ano nungtakba pur nema teyari agütsütsü, anungji JCB Excavator nungtakertemi 8787620256 aser Ambulance nungtakertemi 7005833794 nung tongtepreptsü akok.

Longleng District Monitoring Committee senden amen

Dimapur, Monupii/May 19 (TYO): Deputy Commissioner, Longleng indang office nung May 12, 2023 nü Longleng District Monitoring Committee pur "Central Sector Scheme for Formation and Promotion of 10000 FPOs" senden ka mena liasü.

Deputy Commissioner, Longleng, Dharam Raj IAS ajanga iba senden indang nukjidong lokti nem angatetdakja liasü.

Project Head, Bhaskar Parnt-i ashiba agi M/s Doric Multimedia Pvt. Ltd ajanga Longleng Block, Tamlu Block aser Sakshi Block shia nung FPO ka-ka lemezüksü. Doric Multimedia Pvt Ltd ajanga item FPOs nem technical teyari agütsütsü.

Tenem-tekong agi sünga aliba mechi tajungtiba nung iba sentong takok ngua inyaka aotsü atema FPO shia aluyimer tajemba agi 100 bosa zülüoktsüla, ta jembia liasü.

FPO shia Board of Directors alitsü aser yangji

zungsem ter alitsü aser parnok rongnung Chief Executive Officer (CEO) ka aser accountant ka alitsü, ta pai ashi.

FPO ya Producer Company Act kübok register asütsüla. FPO takok angutsü atema committee lenisüba aser senotsü ketdangsuba tongtipang alitsü, ta ashi.

FPO shiai primary aser secondary crops dak rangloksü atema jembia aser Longleng Block yagi süngmok (ginger) lu ayimba nung rangloksü, Tamlu Block yagi Coffee tsünüba nung rangloksü aser Sakshi Block yagi jenjang-menjang (Maze/mustard) lu nung rangloksü lemteta liasü.

Iba den ano secondary crops atema Longleng Block nung Pineapple, Litchi, Orange, Coffee, Rubber; Tamlu Block nung Betel vine, Areca nut, lime, large cardamom aser Sakshi Block Ginger, Colocassia, (tu-tera) leafy vegetables anepalutsü lemtet.

Maneni Hukphang aser

Lingtak nungi kilen 40 shi agi tentetba telok kati süngmok lu kanga junga ayimba atema committee ajanga tenüngsang agüja liasü.

Iba telok ya FPO kumdaksütsü aser parnok inyaksangshi nung takotet akumba ajiteta tarutsü nung terenlok asoshi lenmang sayutsü lemteta liasü.

District nung processing units, cold storage facilities peria maliba aser osettsüset belenshitsü asoshi timtem ajuruba densema mepetmesü timtem balala indang committee ajanga jembia liasü.

Ajisüaka item timtem ajangettsü asoshi Doric Multimedia Pvt. Ltd ajanga tongtipang shilem agitsü teimla lemsatapa liasü.

District Agriculture Office ajanga Doric Multimedia Pvt. Ltd den lungjemer FPO shia atema primary aser secondary crops tem jangjatetsü committee ajanga lemteta liasü. Item crops ya taruba senden nung tatem kuma lemtetsü.

Meyi mapang Mokokchung nung department balala saksalemer

Dimapur, Monupii/May 19 (TYO): District Disaster Management Authority (DDMA) Mokokchung pur meyi mapang renemshia alitsü asoshi senden ka Deputy Commissioner, Mokokchung indang conference hall nung May 19, 2023 nü mena liasü.

Iba senden nung Deputy Commissioner aser Chairman, DDMA Mokokchung, Sashank Pratap Singh IAS ajanga department balala dang meyi mapang lendong balala atalokba mapang yariteptsü asoshi renema alitsü ayongzüka liasü.

Department kobaisa equipment list magütsü ali, itemji tekeratiba nung agütsütsü pai nenshia ashi. Pai Head of Offices tem dang lendong paidoktsü asoshi yaritepa nung department ajanga koba jenjang nung shilem agitetsü, itemji kanga junga asameyangtsü asüngdanga liasü.

Department temi social work ayongzüka kilentzü aoba lenmangtem müreksü pai ayongzük aser iba ama shilem tila agiba ajanga meyi mapang lendong tulu paidoktsü, ta ashi.

Iba senden nung

PWD(R&B), National Highway aser Urban Development department tem dang lenmang junga anepaluba nung temolung agütsütsü tuyu aser contractor tem dang tang ali tasen toa aoba mapang asüyonga gari senzütetsüsa lenmang yanglutsütsü aser koda masüba mapang temelen lenmang agütsütsü metetdakja liasü.

Kasa senden nung Food & Civil Supplies Department dang ita asem atema chiyongtsü rizünga ayutsü metetdaksü.

DC & Chairman, DDMA Mokokchung ajanga Home Guards & Civil Defense department dang saksalema alitsü ashi aser ketdangsurtem medical emergency dak alaka meyi mapang shinga nema leave magütsütsü ashi.

Medica Department dang emergency/basic medicines tem renema alitsü nungloksü aser sendaktepa aliba department tem dang teti renema alitsü metetdaksü.

Maneni DC ajangasa district nung Head of Offices ajanga dang meyi mapang station nung alitsü shia liasü.

IMDH Mkg. nung May 20 nü angati temang reprangtsü



Metsüben Hotel Mokokchung nung May 20 nü Apollo Hospitals, Guwahati nungi arur mongin doctortem aser Mokokchung osang zülurtem senden akaba mapang tangokba noksa.

Mokokchung, Monupii/May 19 (TYO): Ao Senden ajanga achayanga North East Health Service Guwahati sentong kübok Apollo Hospitals, Guwahati nungi mongin doctortem aruagi May 20 anogo Dr Imkongliba Memorial District Hospital (IMDH) nung free Health Screening Camp ka akatsü.

Iba sentong dak ajemdaker May 19 nikongdang Metsüben Hotel Mokokchung nung May 20 free Health Screening Camp akatsü nungtem nung Apollo Hospitals, Guwahati puri ayongzüka Mokokchung nung osang zülurtem den senden ka menogo.

Kum shia May 20 ya Apollo Day amunger aser takum iba anogomung nungtem nung Mokokchung nung aliba nüburtem nem teyari lenmang ka agutsütsü lemtet aser iba sentong nung yariteptsü asoshi Cardiology, neurosurgery, Gastroenterology aser

pediatrics nungi mongin doctor 5, Dr. Siddhartha Goswami, Medicine department, critical care expert, Dr. Shameem Ahmed, Neurosurgery, Dr. Chandra Kr Das, Cardiology, Dr. Javiya Chetan Dineshbhai, Paediatric aser Dr. Pankaj Sukla Baidya, Gastroenterology nunger arua lir ta ashi.

Parnokisa North East Health Service ajanga iba sentong ayongzükba ya Health and welfare Department, Government of Nagaland-i temelaba aguja lirta metetdakja liasü.

Parnokisa May 20 nü angati temang reprangba den ano teyari lenmang balala sayutsü. Item maparentemji tembanger kelen ano May 20 nüsa Police personnels, fire department aser Assam Rifles nunger dang lendong mapang nung nüburtem anepalua kumzüksü medical education tesayuba agutsütsüta lemsatapa osang zülurtem den lemsatapa liasü.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA
NOTIFICATION**

Dated Kohima the 18th May 2023

NO. ED/EST/B-1/2019:: In continuation of Advertisement No. ED/EST/B-1/2019 dated 9th January 2023 which appeared in the Local Dailies regarding Recruitment of 25 Posts of Driver under the Directorate of School Education, candidates are requested to verify the information provided by them from the Department's Online Services Portal <https://dosenl.in> or Office Notice Board and inform Ms Sorhono at 9366536275 by 25th May 2023. Post 25th May, no request for correction will be entertained.

**(THAVASEELANK) IAS
Principal Director**

**GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND:: KOHIMA.**

No.DHFW-5/D.Pharm/Part-II/2014/ *Dated, Kohima* *thMay' 2023*

Advertisement

As per Government Approval Vide Order No.HFW(A)/MISC-12/35/2015/317/Dated, Kohima the 18th May, 2023 invites interested local candidates to undergo Diploma in Pharmacy course for the academic session 2023 at Assam Medical College, Dibrugarh. **The last date for submission of application form is 23rd May, 2023.** Short listing criteria and other details are as follows:

- 5 (Five) Nos. of Seats available.
- Applicant should have cleared HSSLC (10+2) in Science Stream with minimum 45% in case of SC/ST candidates (Physics, Chemistry, Biology).
- All relevant documents: HSLC & HSSLC Admit card, Mark sheet, Certificates, SC/ST Certificates, Indigenous Certificate, one recent Passport size photo, should be enclosed along with the application with complete address and contact no.
- The maximum age limit is 25 years on or before **1st April' 2023.**
- Application Form can be downloaded from the Department website: nagahealth.nagaland.gov.in
- Last date of submission of Application forms will be on 23rd May 2023.** Duly filled in application in hard copy along with requisite supporting documents should be submitted in **Room No.210 (Training Section)** along with Rs.200/- as processing fee.
- Selection will be done based on Academic Merit Marks.

Sd/-
DR. VIBETUONUO M.SACHU
Principal Director,
Directorate of Health & Family Welfare,
Nagaland : Kohima.

DEBTS RECOVERY TRIBUNAL GUWAHATI

Suwarna Bhawan, House No.12, New Town Path,
Near Hanuman Mandir, G.S. Road, Ulubari, Guwahati - 781007 (Assam)

Case No.: OA/26/2023

Iba Act nung section 19 kübok sub-section (4) nung ajemdaker jaoker, Debt Recovery Tribunal (Procedure) Rules, 1993 rule 5 indang sub-rule (2A) den azüngtsü akok.

Exh. No.: 3244

**HDFC BANK
VS
MESSERS SHIV SHAKTI HARDWARE**

To,
(1) MR TOHOKHE Z AWOMI
SON OF SRI ZHEKLYE AWOMI RESIDENT OF PURANA BAZAR DIMAPUR
NAGALAND PIN 797112
DIMAPUR, NAGALAND- 797112

JAOKER

15/05/2023 anogo nung Hon'ble Presiding Officer/Registrar matsüngdang OA/26/2023 list süogo.

Sentsüh Rs.4121837.18/- alangzütsü atema na anema benokba (OA) sülen iba Act nung section 19(4) kübok shia alima Application nung ajemdaker iba Tribunal-i jaoker. (application den documents densema lir).

Iba Act nung section 19 kübok sub-section (4) nung aliba ama na aser defendants dang tekübokken alibatem tuyur:- (i) iba case defend asürtemi tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksür; (ii) applicant-i original application nung serial number 3A kübok shia aliba kiojen aser osettsüset dak alia tanga kiojen aser osettsüset sangdongang; (iii) nai original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar; (iv) Security interest atema inyaksangshiba dak alaka nai Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla; (v) Ordinary business ajanga secured assets mesüra tanga assets aser kiojen nungi yokzüka senji security interest soita aliba bank mesüra financial institutions indang account nung deposit asütsüla.

Nü dang applicant nem tezüluba nung sangdong agütsütsü tuyur aser 08/06/2023 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangtsü aser na maliyonga telemetba agütsü.

16/05/2023 anogo nung tsünglanglen kü meyonngem den iba Tribunal indang seal agütsü:

Sd/- Registrar,
Debts Recovery Tribunal
GUWAHATI

India-i Myanmar nung Cyclone agi kongshirtem nem teyari agütsür

New Delhi, May 19 tama Yangon tonga ogo, ta (Agencies): India-i Myanmar metetdaksü.

nung cyclone Mocha agi Jaishankar-i twitter ajanga, kongshiba nüburttem atema "India-i Myanmar nung Navy rong pezü nung teyari oset #CycloneMocha agi kongshiba balala bener yokogo. nüburttem nem medemer ama

Cyclone agi kongshiba sülen teyari agütsür. India-i kidanger linük yariba #OperationKaruna tang tagidak mission ji 'Operation Karuna' lir. Indian Navy rong asem nung asütsü, ta Ministry of External Affairs-i metetdaksü. teyari oset balala bentsür tanü Yangon tonga ogo. Asüng rong

pezübubaji tonga aotsü," ta metetdaksü.

Hokolbarnü External Affairs Minister, S Jaishankar-i "Rong nungji emergency sangdong ka ajanga, navy rong chiyungtsü balala, süki, pezü nungji emergency chiyungtsü balala, nungdakba mozütem, water pumps, pumps, portable generators, portable generators aser süoshi, stüoshi, sanitary aser hygiene bener yok, ta metetdaksü. items densema lir. Region nung

Navy ketdangser kati, Indian mezüng teyari agütsürji maneni India lir," ta Jaishankar-i Shivalik, Kamorta aser Savitri metetdaksü.

PM Modi-i Japan densema linük asem semdangtsü apusoa ogo



New Delhi, May 19 (Agencies): Ato kilonser, Narendra Modi-i Japan, Papua New Guinea aser Australia linüktem semdanga G7 aser Quad senden densema senden balala nung adentsü atema Hokolbarnü New Delhi nungi apusoa ogo.

Modi-i mezüng Japan semdanga Hiroshima yimti nung May 19 nungi May 21 tashi G7 senden nung adentsü aser iba senden nungji pai chiyungtsü security aser energy security densema alima nung tayongzüka onük balala atema jembitsü.

May 22 nü Modi-i Papua New Guinea semdangtsü aser Port Moresby nung Ato kilonser, James Marape tena leniba nung Forum for India-Pacific Islands Cooperation (FIPIC) senden amentsü. Tatemsa Modi-i May 22

senden ya kanga tetezü akettsü. G7 linüktem aser tejaoker linüktem den alima tebilemstü onük balala tebilemba lemsateptsü ni yongyar," ta Modi-i metetdaksü. "Hiroshima nung G7 senden nung adener lenirtem kar den ni jurila senden amentsü tebilemba lir," ta paisa metetdaksü.

Papua New Guinea semdangtsü aliba dak sendakba nung pai, "Pacific Island Countries (PIC)

14 prongla iba ama tongtibang senden (FIPIC) nung adentsü melungba atema pelar," ta ashi.

2014 küm Modi-i Fiji s e m d a n g b a mapang nung FIPIC ya tenteta liasü. Australia nung Modi-i Australia Ato kilonser, Anthony Albanese den senden amenba dak alia

Australia nung CEOs aser business lenirtem den-a senden amentsü aser Sydney nung India nungertema ajurutsü.

Delhi nungi apusotsü lia Modi-i, tang G20 Tirji India lir, anungji pa G7 senden nung amenba ajanga tetezü kanga akettsü, ta metetdaksü. "G20 Tirji India lir anungji G7

		SALE NOTICE		DIMAPUR- II BRANCH Nyamo Lotha Road, Near Plaza Bakery, Dimapur- 797112	
Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rules 8(6) nung ajemdaker E-auction ajanga kiojen ayoktsü sangdong.					
Public aser talisa sen apur (tem) aser Guarantor (tem) nem iba osang ya metetdaksür- Secured Creditor dang mortgaged/charged asüba tsünglanglen shia aliba kiojen Canara Bank nung Authorised Officer-i agiadokogo, aser sen apur & Guarantor dang nungi Branch of Canara Bank-i sen tagütsütsü aliba alangzütsü atema 26.06.2023 anogo nung kiojenji "kong aliar yamaji" aser "yangji aliba ajak" yokadoktsü.					
Earnest Money Deposit (EMD) ji 23.06.2023 anogo nikongdang 4:00 ako tashi nung agütsütsüla. Auction ji website: http://indianbankseaction.com ajanga "Online E-auctioning" asütsü. Auction anogo aser mapang: 26.06.2023 anogo nung anepdang 11:00 ako nungi nikongdang 01:00 ako tashi. (Ayokba metembang tashi mapang shia minute 5 atsülangtsü)					
Branch, sen apur/guarantor, liability, kiojen osang aser EMD, reserve price tejangja:					
Sl. No.	(A) Name & Address of Secured Creditor/ Branch (B) Name of Borrower/ Guarantor	Brief Description of Immovable Property		(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):	
1.	(A) Canara Bank, Dimapur- II Branch, Nyamo Lotha Road, Near Plaza Bakery, Dimapur- 797112. (B) Borrower: Bendangangshi AO Guarantors: NIL Corporate Guarantors: NA	A plot of land and building with land measuring 0B-0K-18Ls covered by Dag No. 557/601 of Patta No.458 situated in the Nagarjan Block, Mouza-03 in the District- Dimapur, Nagaland standing in the name of Bendangangshi AO and bounded by:- Boundary (As per sale deed): North: Bendangsashi, South: Rev. Z.Yapang Aier, East: Mrs.Delhookrie, West: Approach Road. Boundary (As per valuation report): North: land of issac, jimmy (zeliang), South: Road East: Road, West: Land and building of Y K Anthony.		(A) Total Liab.: 93,99,643.07 + further interest & cost. (B) Reserve price: 15.00 lakhs (C) EMD: 1.50 lakhs (D) Increment Amount: 50,000/-	
Iba sale atema telatetbatem tejangja ajak Canara Bank indang website (www.canarabank.com) nung aliba link "E-Auction" nung agüja lir, mesüra mapa inyakba anogo nung office mapang nung Branch in Charge of Dimapur- II Branch den Contact No. +91 7550801060 ajanga tongtepreptsü akok.					
Date: 19.05.2023, Place: Dimapur			Authorized Officer, CANARA BANK		



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 20, 2023

Senso ayoker na ?

Asenoki khen khen parnokbo senso ali, anungji par yimer senso mesüra Aor senso mesüra Naga nungger senso kümogo ta jembir. Aji shitak asü masüar ashitsü makok, saka asen yimer mesüra asen kin senso ya dokan nung ayokba oset amato ayoktsü aser alitsü akokba temeten oset ka asünungbo, iba jagi asenoksasa asenok meramaket kümogo ta bilemdi. Alima nung oset ajak pei pei alang jenjang lir, aji süaka ano karbo onsara senti asüba agi jenjang ataktsü makoker. Aji 'Priceless'. Item ama jenjang ataktsü makokba senti rongsen rongnung 'senso' ta asüba jenjang ya ka lir. Ibayongji, Nagaland nunga Naga Students' federation (NSF)-i Naga nungger sensobo tebu ayimba agi masü saka azü agi sosemba (Naga by Blood not by Adoption) asütsüla ta akhidang nungi yimyim agüja Naga nungger temeten, tagitarutsü aser sobaliba wazüka ayutsü asoshi merangba angur. Kasaji, tanüa Nagaland state government-ia Naga nungger masü ser nung Naga nungger ka dang tebu ajaba agi mesüra tebu Naga nungger masü saka tetsü dang Nagatsür asüba agibo pa mesüra laji Nagaland nung Naga nungger senso mekümtetsü, anungji parnok nemji yimtak yimtsüng nung putu menden aser Goanbora-temi Sheduled Tribe mesüra Indigenous Inhabitants Certificate agütsütsü atema temeten agüja kuli mesütsütsüla ta nenshia metetdaksüba angashir. Atangji, ibai ozüng tasen ka masü, kechiyong Naga nunggersa süaka Nagaland nung 1963 küm mezüng adokba electoral roll nung pei tenüng mesüra pei tsürabur tenüng malirtembo Nagaland nung senso asütsü makok. Ano, Nagaland nungbo 1963 küm jakdang arua ali kimong alia alir sensosa asüyonga senso tapu ana, kaji Naga nungger aser tangabaji tzümartem asütsü. Sensobo senso saka ka Scheduled Tribe aser tsümartemjibo Scheduled Tribe masü. Iba jagi Nagaland makümdangyongi Naga lima nung arua alirtem süaka election nunga Dimapur-1 assembly constituency dak alaka tangar constituency 59 nungbo Naga nungger dak alaka tangar tokteptsü makok. Iba kasaji government mapa bushiba aser technical course azüngtsü atema menden bushiba nunga kasa India kübok India sensosangersa süaka Nagaland nem lezmüksüba shilem nungbo Naga nungger dak alaka tangartemi rakteptsü makoker. Aji oda, Naga nungger zü adenba senso ka mesüra Nagaland nung ali alitsüa makok. Iba jagi dang tanü tashi Nagaland government mapa nunga Naga nungger maongka talubosa agitetter aser sen meindoki kaketshirtem aika technical course agitetter. Iba temeten aser temoatsüji memeteti asenok aikati Naga nungger masü ser nung asen den semloka aliba agi mesüra tetsübo asen asüba agi asen den kasasa senso kümdaktsür. Ibayongji tanübo "olabo Yakob ola saka tepenbo Isau tepen" ta ashiba amato tenüng aser kidongji dang Aor ashi temang ,shi azü, shisatsü aser tekolokbo tangar ta asüba asen adianutem aika kümogo. Iba tia aser onük nung ya asenok ajaki khen aroka bilemdangtsüsa adoker aser senso kaji ozüng raksaa tezülen nungi senso akümba senso ka masü saka ozüng ajanga shitakbalen nungi senso akümtsüsa asenoka asen inyakyim ozüng (adoption law) ka alitsüla ta bilemer. Tangar shinga nema senso temeten aser kin kidong tenüng magütsütsü, kechiyong senso temeten yabo azü nungi aruba senmang ta asenoki tang amai raa nokdakaka, asenoki kar nembo senso temeten magütsü maremtsüsa ataloker aser ataloktsü. Aji oda, tebuo tangar saka Nagatsürtemi asoba nisungtem dang masü saka tsürabur anaprongla tsümar ser nung Naga nungger kibongtem nung mesüa intetdaksüba tanurtem aika tanübo Naga nungger kümer lir. Ashiko, ibaji temeim agi asütsüa akok. Tarutsü nunga aji mepaidoktetsü. Anungji, tangar America nungger lima nung asenoka America nungger senso kümtetba ama, tebu tangar süaka Nagatsüri asoba agi asütsüa akok mesüra Nagaland nung asoba agi asütsüa akok mesüra Naga nungger kibong kati pei jala mesüra jabaso küma mesütetba agi asütsüa akok mesüra Nagaland nung pei tsürabur meyong ali kimong aser kiojen aliba agi asütsüa akok, parnokji Naga nungger senso kümnüra, temzüng ozüng ka ajanga kümtetsüsa tanü putu nungbo 'Nagaland Adoption Act' ka alitsü nüngdaka reprangteter.

OLEMSABANG

Naga nungger Yashi, Tanü aser Asüng indang

B. Wati Jamir Arkong Ward, Mokokchung.

(Yashi adok nungi...)

Assam nunggeri Naga nungger ali atsünga aruba den item süngu lu Naga nungger lushi nung ken atema lapokyonga aoba tanü Naga nungger kechi jenjang nung yua ali?

1. Bihuba Tea Estate
2. Lakmijem Tea Estate
3. Geleki Tea Estate
4. Atkhet Tea Estate
5. Deopani Tea Estate
6. Bursela Tea Estate
7. Tipok Tea Estate
8. Halu Wating Tea Estate
9. Amguri Tea Estate
10. Laajan Tea Estate
11. Rajabari Tea Estate
12. Simon Tea Estate
13. Charidle Tea Estate
14. Barhala Tea Estate
15. Goro Tea Estate

Ano British yimsüsüba mapang nungi tenzüka Naga nungger lushi yanglua akaba ttng Assam nunggeri reserved forest aika makaa lir, itemji yamai;

1. Tiru Hills Reserved Forest
2. Diphu Reserved Forest
3. Dhansiri Reserved Forest
4. Kakadanga Reserved Forest
5. Doyang Reserved Forest
6. Nambur Reserved Forest
7. Geleki Reserved Forest
8. Desai Reserved Forest
9. Rangapar Reserved Forest
10. Intanki Reserved Forest
11. Singpom Reserved Forest

Ano Naga nungger lushi nung totsüi/resources agiya atatsü atema Assam nungger nem mapang tedaktet ka yur temelaba agütsü, saka kodang mapang tongdir itemji Naga nungger meyongsa asütsüla ta tezüluba lir, itemji;

1. Barjan Collier
2. Naginimora Colliers (ita ishika dang melaba)
3. Nazira Colliers (with fixed taxes for certain limit)
4. Nazira Oil Field.

Ano putusa putu pei lima mulung maparen balala den alu yima aruba tanü Assam nunggeri ajak atsüngdoker Assam Police-i mekhabanga ayur aser item ajaki parnok li ta ashir. Süra item nungji asenok Naga nunggeri kechi tashi inyaka ali. Tarutsü (asüng lima) lima atema kenyongi bilema mali.

Süpokrem aser ochimashi maparen atema tang nüburtem ariteper. Assam nunggeri Naga nungger li rakzüka aobabo nüburtemi kenyongi bilema mali. Supreme court tashi nung Assam nungger den ali atema Case agüja ayu, saka ibaji obendang magütsüdang Assam nunggeri ali ajak rakzüka ayutsü meranger. Court-i obendang magütsüteter kechiyong supreme court-i Assam aser Nagaland lipok otsü memetet. Ali raktepba ken-o-bo pei ali kiburi dang metet. Süpokrem aser tiyazü jembia ali tashi asüng lima nübur nem kechi toktsür. Naga nungger ajungai sübokrem, tiyazü aser ochimashi endokdi aser Ochiji bena arudi, kechiyong Isaia 59:4 nung yamai zülua lir, "Ochi asoshi shingaia memepishir ochi pukümer shinga mali. Parnoki amajok nung temulung alemer aser tiyazü jembir tai shisar aser tai temenen adokdaksür." Ano maneni Isaia 59: 14 nungjia yamai zülua lir, "Ochiba tesüleni atsüngzüka ogo, aser temeshiba talang nung oagi lir. Kechiyong yimdong nung ochiba laoa lir aser teindang jakla aitsü makoker."

Asenok ajak Khristanpurtem, anungji Laishibai kechi ashir itemji inyaka tarutsü lima atema ochi puküm nung lidi. Pei libajen/ayak (identity) wazüka yudi iba den yashi putu tanü putu ajak züngogo, joko asenoki lanur nem asüng Naga lima tajung atema wazüka yutsüdi. Ochi nung nokdakdi Khrista yimsü tajung kobai Naga nungger ajunga tenük lapoktsü aser longjemdaksü iba yimsü ya meranga azüitdi.

LAISHIBAI ASHIR

OH ISREAL TONGTIPURTEM OJANG SÜANG, TASHIYIM MAPA ASER TEMAKZÜKBA AGIENANG OCHIBA ASER SHITAK INYAKANG, KÜ NÜBUR PARNOK TALIDAK KI NUNGI ARIDOKBA ANENDAKJANG TA KIBUBA TSÜNGREMI ASHIR. EZEKIEL 45:09.

Iba Olemsabang nung lemsaba ken-o aser shisatsü ya iba ocet züluri bilema ken-o ama tazünger angateta agitsü mepishir

Theological Educators aser Lim Arogo Telungjem sentong agi



May 18-19 anogotem nung Impur nung Ao Theological Educators aser Lim Arogo Telungjem sentong agiba sülen tangokba noksa nung angur.

Impur, Monupii/May 19 (TYO): ABAM Literature & Education Ministry-i achaayanga Ao Theological Educators aser Lim Arogo Telungjem sentong Impur nung May 18-19, 2023 anogotem nung kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Rev. Dr. Mar Pongener, Executive Secretary, ABAM ajanga omen "Tenzükba wadang nung Liromedem" nung ajemdaker jembidang, "Tanü Arogo ka rangben temang taküm alitsü asoshi takümbanger aser tetuyur ka nungdaker, aser ibaji asenok tenzükertem ya lir. Asenok tsüngda Liromedema tenzükba ajanga dang asenok ya takümbangerji sütettsü. Iba liromedem adoktsü asoshi Theological Educators aser Arogo nung tenzükertemi kati ka metettepa alitsüla, sentong balala nung amalitepa nübo

agütsütettsüla aser mapang ajak nung yongyatepba tanela alitsüla," ta ayongzük.

Iba sentong nung onük ana lemsar agia liasü.

Mezüngbuba onükji-Theological Educators-i Arogo nungi yimlaba: Iba onük nung shisalen sayurtemi bener aruba tongtibangtemji yamai: Atsüabong tebandang makai Arogo nung tenzükdaksütsü, Theology azüngtsüpurtem screening junga asütsü, Theology azüngertem asoshi lenmang yanglutsütsü aser Temang nung mokokmeinertem asoshi temulung agütsütsü. Iba onük nung Shisalen sayurtemji- Rev. Dr. A. Tali Ao, Academic Dean, Clark Theological College, Mrs. Takosenla Walling, VP, New Life Theological College, Rev. Dr. Prof., S. Temjen Imchen, Principal, Agape College aser Mrs. Narola Walling, Associate Professor, DBC nung liasü.

Tanabuba onükji Arogoi Theological Educators nungi

yimlaba: Iba onük nung jembirtemi ashiba tongtipang onük kar yamai; Tanela Temeshi agi aniba tesayur, Kilir ka jenjang nung tangatetba agütsüba, Tanela taküm aser Tangazükba lirumedem agütsüba, Mitkar taküm kaka asüba aser Lokti Tebilemstü kisüng dak amendaker sayuba masü saka Laishiba dak amendaker sayuba shisaliok tesem asütsüla. Iba onük nung shisalen sayurtemji- Mrs. Alemla mozer, Secretary, ABAM WM, Rev. Temsüwati, Asso. Pastor, MTBA, Dr. Lolen Imchen, Pastor, Mangmetong Baptist Arogo aser Rev. Tiatoshi Longkümer, Pastor KABA nung liasü.

Ajak agi Theological Educators 35 aser Arogo 75 nungi tenzükertem 143 arua iba sentong nung aden.

Maneni lokti ana liromedema lungjemer Tsüngremer wadang inyakdang tanela aika kodak lenmangi anitsü tamang sarasadem ayur.

Linük 200 nung religious freedom jenjang tamajungba kümogo

May 19, 2023: Tan hopta U.S. Department of State-i International Religious Freedom (IRF) report sayaogo, aser iba report ajanga ashiba agi, linük 200 nung religious freedom jenjang ano tamajungba dang kümogo, ta metetdaksü.

Anogo ishika jakdang Washington nung iba report sayaba sentong nung jembidang U.S. Secretary of State, Antony Blinken-i, "Tsüngrem dak amangtsü mesüra mamangtsü temedenji onoki nungiter; ibaji tim asüba yong dang masü saka yimsü amangertemi asen loktiliba nung mapa tajung aika inyakba aser alima tesem balala nung yimjung ajungkettsüba, shirangertem yariba, alima kümzükba aser timtemertem tenzükba ya

kanga tajung asübayong onoki item temeden nungiter," ta metetdakja liasü.

US State Department-isa, 2022 küm Brazil densema linük kar nungbo religious freedom jenjang tajungba kümogo, ta metetdaksü.

Linük kar nung religious freedom jenjang tajungba akümyonga alima tesem tuluba ka nung religious freedom jenjang tamajungba akümer aser Khristantem densema minorities atema tensa tamajungba akümer, ta report nung shia lir.

IRF report nungsa Iran nung tensa ano tamajungba akümba aser sorkari mapang shia longkak aitertemi Islam anema jembir, ta tai tonglokja tepsetba atema tebilemstü akaba lemsatop.

Iran nung tepuokdak

alirtem nem temerenshi agüja tetsüng-tepen alangdoktsür, lisü agi areper, kija tepuokdak ayur aser tasüba temerenshi obendang agütsür, ta report nung shia lir.

Nicaragua linük nunga sorkar aser loktiliba Catholic Arogo bendangshidanga züngshir, Arogo lenirtem apur, saru agir aser amokmerener. Linük Tir, Daniel Ortega-i putirtem ya ozüng alema inyakertem lir, ta sangdongba sülen Arogo anema inyakba ano tamajungba kümogo.

Nigeria nung, talisa Northern Region nung kiralongrar telok balala, Fulani Muslims aser auer telok balalai Khristantem anema inyaker, ajisüaka Khristantem timtembaji sorkari mangu ama dang toktsür, ta Report nung shia lir.

ANOGO ABEN TSÜNGREM DEN

Tasen kümshiba
(T.ken 104: 27-30)

Scientisttemi ashir, alimaji yimya ozüng agi meketbanga lir. Parnok timbai ozüng Tesülenji ozüng Agütsür ka shibai ajak anebalur Pa lir ta amadoker. Shibai alima rangpenji sendaktepdaksür? Tsüngrem shibai ibai yanglu, Pai sendaktepdaksür. Teyangluba ajaki Pa dang atar aser nungdaktem Pai agütsütsü amanger. Ken züluri züluba ama, "Item ajaki nai mapang tetemsü nung parnok nem chiyongtsü agütsütsü ataa lir. Nai parnok nem agütsüba parnoki bendener; Nai ne ket salar, parnok tajung agi asünger" (t.27,28).

Tsüngremi agütsür aser asenoki bendener. Pai moatsür aser asenoki agir. Paji mulunglemstü; Pai Pa meyong anebalur. "Aji saka temeshipur senzüka yutsüba, mesüra Pa metsü meshimetsüba ni mangu," ta Dawidi ashi (T.Ken 37:25). Tsüngremji ano tagütsünü. Pai mekümdangi mesüra merumerua magütsür. Pai Pa teka salar, aser teyangluba ajak tajung agi süngtsür.

Tsüngremi taküm aser tasü aser tsüngküm ajak azüoker. "Nai ne jak miimadokdang, parnok timatemer; kodang nai parnok chiyongtsü bener oadoker parnok asür, aser tanaben ali akümer. Kodang ne tangula nai yokdir parnok poktetter. Aser nai alima tejak tasen kümdaksür" (t.29,30). Metsü tsüngküm kanga tobur tajung, meyi mapang jangratemstü, Mangkonang mapang süngjang agi sünga alir. Iba sülen tsüngküm arur, aser ibai kanga takong alir. Saka metsü mapang, meyi mapang aser Mangkonang Tsüngremji kasa Tsüngrem, tsüngküm Tsüngrem lir. Pai tasen kümshiba metsü mapangji bener arutsür.

Tanü Tsüngremi ne taküm tasen kümshidaktsütsü akok. Pai ne nem metsümenang tsüngküm bener arutsütsü akok. Taküm tsüngküm indang shisa tebulu. Tsüngrem shibai iba lima rangpen repranger Pa ne taküm tsüngküm melenshiba reprangtsü akok. Ne taküm tsüngküm nung lira, Pai ne dang metsü mapang yoktsü ataa liang.

Plateau State nung Khristan 42 tepset

May 19, 2023: Mongolbar Nigeria nung Plateau State kübok Mangu County anasa prangpong amer telok kati Khristan 42 tepset aser ki aika rongdoktsüogo, ta International Christian Concern (ICC)-i metetdaksü.

Khristantem amakertemji Fulani telok asütsüa akok ta melung meleme bilemer. Parnoki May 15 ayaterm nungi tenzükba May 16 anepdang tashi nung yim 11 amak. Iba tesemji Plateau State yimtiba, Jos nungi mile 55 shi pilar lir.

Plateau State Governor shima alisang, Caleb Mutfwang-i Fulani telok aitsüba den külemi sorkar dang Plateau state nung nüburtem kümzüktsü atema ano taliba nendaka inyakdaksüner, ta mepishiogo. Taküm-a Fulani kiralongrartemi Mangu County aiben maakogo. March ita elections nung Mutfwang aser par party- Peoples Democratic Party-i takok anguba sülen iba district nung Khristan 60 dak tema tepseta liasü.

Lawyer aser yimtenren lenir, Mutfwang ya taoba mapang Mangu Local Government Area of Plateau State nunga Chairman liasü.

Mutfwang-i, Islam yimsü alia amanger Fulani teloki Khristantem tepsetba ya lisopur merüktettsü atema inyakba lir, ta aija liasü.

Fulani teloki talisa aluyimer Khristantem anema inyaker. Tesüiba küm 20 tsüngda parnoki Khristan 50,000 dak tema tepsetogo aser nisung million aika jenshiogo.

Aluyimba li agi meperiba agi Khristantem meyong ali rakzüktsü nükjidong nung shiruru metsür Fulani Muslim nungertemi Khristantem amaker, ta aikati bilemer.

Tawa Khritan aika tepsetba sülen Plateau State sorkari Fulani Muslim nungertem dang ainlen mesenzütsü metetdaksüba den curfew ozüng benokogo. Ajisüaka Fulani nungertemi parnok senzüsembongtsü atema sorkar aser mitkar lenirtem ket nungi temelaba melamela dang angur, ta tenük kuli alirtemi metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Putir

(n) Tsüngrem külemba mapa nung ketdangser (priest)
* Arogo nung deacon ya putir ama amshir.

Putisü

(n) makokeri takoker nem talang agütsüba (war indemnity)
* Germany nungeri alima kintem nem putisü agütsü.

OLONG PAITEP # 6520

Grid for OLONG PAITEP # 6520 with numbers 1-16 in various positions.

TIPIEN

- 1. Pei sasa ulua bilemba -6
5. Nisung aika -5
7. Tebang nungi adokba -3
9. Tatalokbatem metetpela -5
10. A _ _ _ nu -3
13. Tebur kin-kidong meraksai jatepba -7
14. Ken atema meshia ata -3
16. Küm ka nung asortem -5
17. Songjen / Ajak -6

LANGTSÜNGLEN

- 2. Shi alangsadak -10
3. Ita ter ana -3
4. Tangoka ayuba -5
6. Tebenja mali -10
8. Sü _ _ _ ong -3
11. T _ _ _ r -3
12. Hopta nung shilem ka -5
15. Süngdong nung shilem ka -3

OLONG PAITEP # 6519 TELANGZÜBA

TIPIEN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :


- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.

NAI-A YA METETTER MA



Whale ta ajaba tzü shiruru tulu kabo kanga dang azüngmeyaka lidagi aser ibaji 1992 küm nungi teti pa kija dang tzü nung senzür. Ibaji kechiba ta süra pa dak nungi adokba olaji tanga whale kechaia magizüker anunggi parnoki pa mebushir. I ba whale noksa ka yangi angur.

Noksa nung meputepi aliba 10 bushiang



SI Junmoni Rabha postmortem report-i otsü balaka ashir



Guwahati, May 19, 2023

(Agencies): Assam Police nung SI Junmoni Rabha indang post-mortem report ajanga ano ashishitep ken o ka adokogo.

Junmoni indang postmortem report ajanga la temang yiruba aser zübo aika keta aliba shia lir.

La asüba sülen ghonda 24 tsüngda post-mortem agi aser la tesaret anatsülen terettem raksaba shia lir. Junmoni Rabha ya brain haemorrhage aser cardiac arrest ajanga asü ta report nungsa shia lir.

Junmoni asüba mapang lai Red T-shirt, blue trousers aser multicolour socks agia liasü.

La indang temekok, tetsüng, teketsü aser teka nung zübotem keta liasü.

Külen, May 18 nikonngang tenük kuli angur Pranab Das Guwahati nungi Nagaon police station-i anir ogo.

Das-i pa Guwahati nungi arurba liasü aser lendong atalokdak atong ta pai ashi.

"Ni highway tabelen tsütsü gari ka anena aliba angu aser kang dang ajungbena truck gari ka arur atsük" ta Das-i ashi.

"Lendong atalokba sülen ni black jeans asemba tebur ka gari ka nungi aluba angu" ta paisa ashi.

"Lendong atalokba sülen ni mapang tatsüka ataa liasü saka Jakhalabandha nungi police

ketdangsür kati kü dang oang ta ashiba agi ni oadok" ta Das-isa metetdaksüogo.

Hokolbarnü All Rabha Students Union (ARSU), All Rabha Women Council (ARWC), Sixth Schedule Demand Committee aser tanga telok aikati yimdong nung Sub-Inspector Junmoni Rabha nem temeten agüjang ta takhangba agüja lungkak aitogo.

Iba sentong nung ARSU Secretary Pradip Rabha, Kamrup District ARSU Secretary Ashok Nongbah, Organize Secretary Ankur K Rabha aser Vice President Namal Kumar Rabha o Vice President Kamburam Rabha nungeri SI Junmoni Rabha asüba jungjunga bushisüngdang asütsü takhangba agütsü.

La ya lendong nung asüba masü saka asaa tepsetba liasü ta parnoki ashi.

ARSU, ARWC aser Sixth Schedule Demand Committee teloktemi Boko Revenue Circle Officer ajanga Assam Chief Minister Himanta Biswa Sarma dangi shidi ka zülüogo.

Parnoki Central Bureau of Investigation (CBI) nem bushisüngdang südaktsütsü aser aibelenertem pua merenshitsü takhangba agütsür.

Rabha teloktemisa SI Junmoni Rabha'er kibong nem

Rs. 1 crore teyari agütsütsü meshiogo aser state sorkari kinunger nem sorkar mapa agütsütsü mepishia metetdaksüogo.

May 16 anepdang 2:00 ako meta Jakhalabandha tesem nung "Lady Singham" ta ajaba Sub Inspector Junmoni Rabha gari lendong ka nung asü.

"Onoki iba taochi maliba tatalokba khukhua aitsür aser aibelenertem pua marui tashi lungkak aitsü" ta ARSU General Secretary Pradip Rabha-i ashi.

"Police ketdangsür kar dena duplicate gold aser counterfeit currency shibelenba maparen ka alitsü akok. Iba ya linük ashioksüba inyakyim ka lir anungi Chief Minister-i iba mapa tera nungi atsüdoktsüla" ta paisa ashi.

"DGP G P Singh-i iba ken o Criminal Investigation Department (CID) nem agütsüogo. Ajsüuka onoki CBI nem bushisüngdang südaktsünür kechiyong CID ya Assam Police nung shilem ka lir aser parnoki timi meinyaktsü akok" ta Pradip Rabha-isa ashi.

"Haibargaon Police Station In-Charge Abhajyoti Rabha-i iba tatalokba nung shilem agia alitsü akok ta temulung malemer anunggi CID pa anema bushisüngdang asütsüla" ta paisa ashi.

Tripura nung 'Aadhar' Card abener Rohingya nunger 5 apu

Agartala, May 19, 2023

(Agencies): Tripura police-i Hokolbarnü Dharmanagar railway station nung Rohingya nunger pungu apu. Tebur asem aser tetsür ana ket nung India indang Aadhar Card bena lir.

Police-i apuba Rohingya nunger ya Noor Kulima, Mohammad Shah, Rozina Begum, Umrullah aser Md Ririan nunger lir. Parnoki ashiba agi ano Ruksar Bibi ta ser nisung ka parnok den lir.

Parnok ajak ya Bangladesh kübok Cox's Bazar nung aliba

Kutupalan Rohingya camp nungi refugee tem lir.

Parnok Bangladesh nung alidang Mohammad Alam ta ser nisung kati parnok nem Indian Aadhar card agütsür India-i yok.

May 18, 2023 nü parnok nisung shiai Rs 25,000 agütsüba sülen Agartala-i aru. Bangladesh kübok Comilla nung barbed-wire fence mejepdang parnok India telung ait ta parnoki ashi.

Agartala aruba sülen Ruksar Bibi-i tangar ka indang motorbike nung jena ao. Parnok Jammu and Kashmir-i aotsüba sentong lir ta

parnoki ashi.

Rohingya nunger nisung pungu ya Dharmanagar Police Station ket nung lir.

Iba tatalokba ajanga Bangladeshi nunger kati India indang Aadhar card kodaser yanglua amshir ta asüba tasüngdangba adoker.

Iba nung nisung shibelenba inyakyim tulu ka alitsü ta police-i temulung melemi bilemer saka administration-i mapa akangakanga meinyakba ajanga nisung shibelenba inyakyim tuluba akümer.



Mizoram nung Sports Minister Robert Romawia Royte-i weightlifter Jeremy Lalrinnunga'er tsürabur nem ali patta agütsüdang agiba noksa angur. Lalrinnunga'er tsüraburtemi pa tenung nung land settlement certificate (LSC) agizük. Lalrinnunga-i Commonwealth Games 2022 nung gold anguba sülen Council of Ministers-i pa nem housing plot agütsütsü mulunga agizükogo ta Minister Royte-i ashi. Mizoram sorkari national, international aser Olympic nung takok anguba saisapongertem asoshi sempet balala renemja lir ta paisa ashi.

CORNERSTONE HIGHER SECONDARY SCHOOL
DUNCAN BASTI, DIMAPUR; NAGALAND

2023 ADMISSION CLASS - XI (Arts & Commerce)

25% Concession on Admission fees to Cornerstone students.

10% Concession on Admission fees for other students with distinction in any subject.

SPECIAL FEATURES

- Free skill development courses on different traits.
- Different clubs for student activities.
- Atal Tinkering Lab (ATL)
- Educational Tours
- Wi-Fi Campus

FACILITIES

- Experienced Faculty
- Well Equipped IT Lab
- Library with e-book facility
- Basketball and Volleyball courts
- Indoor stadium
- Hostel
- Science and Mathematics Laboratory
- Canteen
- Secured Campus with CCTV Cameras
- Spacious campus with children's playground

Prospectus & Admission forms available at

- CORNERSTONE HR. SEC. SCHOOL**
Duncan Basti, Dimapur, Nagaland
- DIGITAL ELECTRONICS**
Near SBI Main Branch, Mon Town, Nagaland
- BAMBUSA EXPRESS**
Arkong Ward, Mokokchung Town, Nagaland

FOR MORE DETAILS CONTACT: PHONE: 8798859818 | E-Mail: cornerstoneforms20@gmail.com

FAZL ALI COLLEGE
MOKOKCHUNG : NAGALAND

NAAC Accredited A Grade College
(Affiliated to Nagaland University)

Arts & Science
Four Years Undergraduate Programme

*** BA Major Course**
Ao, English, Economics, Education, Geography, History, Philosophy, Political Sc., Sociology

*** BSc Major Course**
Botany, Chemistry, Geography, Mathematics, Physics, Zoology.

*** Minor Course**
BA - Ao, Economics, Education, English, Functional Eng., Geography, History, Maths, Philosophy, Political Sc., Sociology.
BSc - Botany, Chemistry, Maths, Comp. Sc., Geography, Physics, Zoology.

ADMISSION SCHEDULE

- Issue & submission of forms:**
23rd - 30th May 2023
- Spot admission:**
(for students securing 70% and above)
24th - 30th May 2023 Time- 10AM to 2PM
- 1st Merit list:**
1st June 2023 (admission from 2nd - 5th June 2023)
- 2nd merit list (if seats are available):**
6th June 2023 (admission on 7th & 8th June 2023)

Admission form will be available from the Office and also can be downloaded from the College website

Hostel Facility Available

admissions@fac.ac.in
https://fac.ac.in

Helpdesk
+91 94366 07203

Pakistan army aliba tesemtem amakba Imran Khan-i aitsü

Islamabad, Monupii/May 19 (Agencies): Taoba Pakistan ato kilonser Imran Khan-i ashiba agi, taoba hopta pa apuba mechi nisung takum samaa longkak aitba mapang mitkar aliba tesemtem amakba atema Pakistan nung alir ajaki aitsür.

"Lahore Corps Commander House amakba shibai maitsür? Pakistan nung yamaji masü nisung ka tenüing küdang shiang," ta pai linük anüdoklen Lahore yimti nung par kidang nungi Brehostibar nikongdang osangbener den jembidang ashi.

May 9 nü Khan ya ochimashi ken o jembitsü atema linük yimtiba, Islamabad nung court kati arua nokdak dang apu. Anogo ana lir Supreme Court ajanga pa apuba ya ozüing agi memela ta sangdonga ser Islamabad nung ano court kati pa May 12 nü chiochtsü totuyuba agütsü.

Khan pur mapang tatsüka lir pa bukumertem ta tenüing agüja alirtemi Lahore nung mitkar lenir ka indang ki telungi aita mi senlochtsü.

Tashi tulu aliba mitkar temi pa aputsü tuyu ta tai tonglokja Khan bukumer temi linük tesem balala nung mitkar amenoka aliba tesemtem amak.

Saka iba ama ki o jen raksaja mi senlochtsüba mapa ya pa bukumer temi intakba masü ta Khan-i Brehostibarnü ashi aser pa aser par Pakistan Tehreek-e-Insaf (PTI) party tenüing menüchtsütsü mechi tasa yangluba lir ta aitsü.

"Iba ki tejen rongdoktsüba ya onok tenüing asentsü mechi asaa inyakba tasa ka lir. Yimtenren nung tetsüing ajemoker küm 27 liyonga arudang ni ki o jen rongdoktsütsü mesüra rongrongshirong adoktsü shidanga ali asü? Ni teti ozüing aser constitution kübok yimjung nung longkak aitsü dang jembia aru," ta arishi küm 70 tain opposition leader-i ashi.

(Maneni tapak 8 nung...)

G7 senden nung shilem agitsü Zelenskyy Japan-i aotsü

Hiroshima, Monupii/May 19 (Agencies): Ukraine rara nung meyiper raratsü sentong lia teyaritep nung tashi itshitsü meranga Volodymyr Zelensky Japan nung G7 senden nung adentsü sentong lir, ta osang ajanga ashir.

Ukraine tir ya Deobarnü Hiroshima tonga arutsü imlar, ajisüaka pa indang office-ibo iba atema kecha sangdonga mali.

Arab linüktem nungi lenirtem ajurutsü atema Zelenskyy ya Hokulbarnü Saudi Arabia-i ao.

G7 senden ya Hokulbarnü tenzüik aser iba mapang asendenshir Russia aitsü aser ano sanction talisa sangdongogo.

Linük tenet - US, UK, France, Italy, Germany, Canada aser Japan agi akumba Group of Seven (G7) ya alima nung democracy tsütsü takartiba linüktem lir. Taküm iba senden nung Australia aser India ama danga linük ti nungi jaoka lir.

Zelenskyy ya iba senden nung videolink ajanga jembitsü sentong lir, saka pa mesüra tawa South Korea semdangla, pa kinungtsü tsüingdong oa adentsü akok, ta takzüa arur.

February 2022 nung rara tenzüiker Kyiv nungi pai tesem talangtipai aobaji ibai alitsü, aser Ukraine alemer danga leni aodang ama pa asoshi lendong lir.

Ajisüaka Russia anema raraba nung teyari tali ngutetra, iba atema pa takum bendanga agütsütsü langa lir.

"Kodang nisung ka tzüyim alema meta talang leni aor, parnoki tetibo asen linük nung atalokba memeteter aser mangateter. Tang ama tensa nung asen tir alitsüji kanga tongtipang," ta Ukraine nung tashi tait National Security and Defence Council indang secretary Oleksiy Danilov-i ashi.

News agency aikati Zelenskyy ya iba senden nung adeni aotsü ta sangdonga lir, saka ketdangsur nungi tejangja shia mali.

Tesüiba anogo ishika tsüingta Zelenskyy-i Italy, Germany, Franse aser UK semdanga lir aser item linük nungi mitkar teyari agütsütsü nangzüka liasü. Pai maneni tembar linüktem dang Ukraine nem advanced fighter jets agütsütsü atema "coalition of jets" ka tentettsü meranger, saka tang tashi linük katia raradang amshiba tayimtsü agütsütsü nangzüka mali.

Hokulbarnü pa Arab League senden nung adentsü Saudi Arabia-i France sorkari agütsüba tayimtsü ka nung ao. Yangnungjaki pa G7 senden nung adentsü aotsü akok, ta ashir.

Pa Hiroshima atongba den külemi lenirtem, talisa Japan Ato Kilonser Fumio Kishida aser India Ato Kilonser Narendra Modi nung dang teyari kanga kumdanga meshitsü merangtsü.

Hokulbarnep Kishida-i Hiroshima Peace Memorial Park nung G7 lenirtem pelashishia agizük aser World War II tembangtsüsa US-i atomic bomb poklochtsüba nung asür nem akum agüja parnoki naru yutsü.

Iba senden mezüing anogo tembangba sangdong nung züingsem linük temi Ukraine nung rara anentsü asoshi mera tasen agitsü nangzüik aser Russia aser par rara nung yarirtem nem sanction tali agütsütsü nangzüik.

Myanmarnung Cyclone Mocha agi asür nisung 145 jungogo

Naypyidaw, Monupii/May 19 (Agencies): Myanmar (Burma) nung tang tashinung tashi tulu cyclone agi asüba nisung 145 jangja lir ta linük indang mitkar yimsüsür temi ashi.

Taoba Deobarnü linük tonga aruba Cyclone Mocha ajanga asürtem ya timba Rohingya minority nungi lir ta parnoki ashir.

Taoba mapang mitkar yimsüsür temi asürtem nisung 21 lir ta shia liasü, saka iba linük nung alirtemi BBC dang nisung 40 shi süogo ta ashi.

Region nung tang century nung yipru tesashitiba yagi nisung 800,000 dak kongshi, ta UN-i ashir.

Mopung ghonda ka nung kilometre 209 tashi kera aonba Mocha - category five yipru - yagi central Myanmar nung Rakhine state aser ano Sagaing aser Magway region tem nung kongshia liasü.

"Cyclone mapang ajak senteper local nisung 145 asü," ta Myanmar mitkar lenirtemi Hokulbarnü sangdong ka nung ashi.

Sangdong ajanga ashiba agi, asürtem rongnung sepai pezü, local nisung 24 aser Rohingya minority nungi nisung 117 alitsü.

Ketdangsur temi iba osang mesangdong dang mezüing nisung 21 süogo ta sangdongba dang nungi kanga agi tali sür alitsü, talisa linük tesem balala nung Rohingya nung jenoka aliba camp tem nung tasür alitsü ta osangtem ajanga shia liasü.

Nisung aliba ki aser süki noklang aika laodaktsü aser linük nung osangtsüsang junga magiteter aser tang tashi nüburttem samar bushiteper.

Rakhine state yimtiba Sittwe nung nisung aika tzükum anasa alir aser yanghi süngdong aser electric pole laoa lenmangtem nokdanga lir.

Yipru aruba sülen mitkar temi local nisungtem dak amakba osangtema lir. Cyclone arur lia northwestern Sagain region nung army tem yimtsüing telungi aйдang nisung meyerijang aika pei ki yutsür jena ao.

2021 küm tashiyim amshia sorkar atsüingdokba mitkar anema Sagaing nung aliba nüburttemi kanga sashia nokdak. Iba tesem nungya sorkar anema militia aika lir, shirnok dang People's Defence Force ta ajar.

Kidanger linük, Bangladesh nung asü-amaba osangbo mali, saka iba yipru yagi Cox's Bazar nung aliba alima nung refugee camp tulutiba nung ki meyerijang aika raksatsü. Yangji Myanmar nungi Rohingya refugee million ka alir.

Asia nung cyclone tongnung tesashitiba, Nargis ajanga Myanmar kübok Irrawaddy Delta nung kongshia nisung takum 140,000 samatsür küm 15 lir Mocha ya aru.

Cyclone ya Atlantic nung hurricane aser Pacific nung typhoon den sako lir.



Jakarta, Indonesia nung May 19, 2023 nü Indonesian U22 national football team bus ka nung mener fans tem den benjongtepa yimtung süa jajaba noksa nung angur. Mongulbarnü Cambodia nung 2023 South East Asia Games asayadang Indonesian U22 national football team-i gold medal ngua liasü. Ibai Indonesia asoshi küm 32 tashi gold medal mongui aruba tembangba asaya ka liasü. Indonesia-i SEA Games nung football asaya nung gold medal asemben nguogo saka 1991 sülen tang mezüngbuba alitsü.

Rafael Nadal-i French Open masayatetsü, taruba küm tatem asütsü

Paris, Monupii/May 19 (Agencies): Telungpo yiruba tang tashi taneptsü monguteti aliba mechi aruya aliba French Open nung shilem magitetsü, ta Rafael Nadal-i Brestostibarnü ashi. Nadal-i Roland Garros ya 14 ben kokogo saka 2004 sülen French Open nung shilem magiba tang mezüngbuba alitsü.

Grand Slam 22 ben koker alisangi osangbener senden ka nung jembidang Roland Garros nung shilem magitetsü ta ashi. Spain nungbai pa tennis asayaba tsütsü 2023 ya tatem asütsü akok, ta ashi.

"Ni Roland Garros masayatetsü. Australia nung ni timtem ajuruba nung onoki

solution mongutet," ta tennis asayar tejeni ashi.

"Tesüiba ita pezü kanga timtema liasü. Roland Garros nung masayatet. Tensa shidakbaji... pandemic sülen kü temangi practice mesüteti arur. Khuret aika lir," ta ashi.

"Temang nung timtem aliba mechi anentsüsa akum. Anentsüji kü telemtetba. Mapang tatsüka atema anentsü. Ita ka ser tesadang mesüra ita pezü. Takzütetba nisung ka masü. Langka ka jembizüka yokli aser danga ka inyakli ta mesüner. Professional tour nung taruba küm ni asoshi tatembang asütsü. Ibai kü tangatetba," ta

Nadal-i ashi.

Paisa taruba küm Paris Olympics nung shilem agitsü imlar, ta ashi. Nadal ya küm tetenzüklen Australian Open asayadang round tanabuba nung telungpo yirua tamakok ajurua liasü aser iba sülen asayamung balala nung shilem magi arur.

Tawa pai tang tesayadak Italian Open nunga masayatetsü, ta sangdonga liasü.

Nadal indang manager-i pa taneptsü angutsü atema ita ana nüngdaksü ta shia liasü, saka tia majung pai Monte Carlo Masters nung masayatetba kisung masü mapang tatsüka anisüngzüksüsa akumer.

Pakistan army aliba tesemtem amakba...

Hokulbarnü Lahore nung anti-terrorism court ka nung nokdak danga Khan-i kasaji ashi, kobai mitkar lenir indang ki raksatsüba atema pa apuba nungi kumzüksü asoshi temelaba agüja liasü.

"Iba ama mapa tamajung inyakba maitsür Pakistan nung kata mali," ta pai court telung nung osangbener dang ashi.

May 9 nü azüdokshiba aser iba sülen sorkari mapa tamajung inyaker pua merenshi tenzükdang nisung ter asüba aser 4,000 dak tema apuba mechi PTI lenir ter dak tema party nungi anenba sülen mitkar indang ki o jen raksatsüba Khan-i aitsür.

Mitkar aliba tesemtem amakba nung temolung melemi pua alirtem Army Act ajanga obendangtsü ta Pakistan ketdangsur temi ashi aser iba telemtetba ya rights groups temi aitsür.

Karachi yimti nungi PTI lenir aser taoba mapang parliament züngsem alisang Mahmood Moulvi-i ashiba agi, kuli ka mechi pai Khan'er party yutsütsü telemtetba agi.

"Linük kati pei army den raraba ya alima nung tesem kecha nunga kodanga matalok.

Ajungben lendong timtem ajuruba mapang asenoki teyari meshiba institution den asenoki meraratsüla aser iba yongji ni anentsü telemtetba agi," ta pai osangbener dang ashi.

Pakistan nung tia maka yimya ka lir aser aji yimten tashi nungi atsüngdokshia political party yimya melenshiba ya lir, ta Moulvi-i ashi.

"Ibai asen puti otsü lir. Kodang political party ka, PTI-a süang mesüra dangartema süang, kodang parnok yimsüsüba menden nung lidir, establishment ya tajungtiba ta ashir. Saka parnok kodang yimsüsüba menden nungi atsüngdokdir, parnoki itemji aitsü tenzüker. Iba amala politics nung mitkartem shilem malitsüla, item party temi teti parnok atsüoker," ta pai ashi.

Yangji telangzüba agüja northwestern Khyber Pakhtunkhwa province nungi taoba mapang PTI minister Taimur Khan Jhagra-i, par party züngsem ya anentsüsa talenba agütsü ta aitsü.

"Ibai Pakistan indang politics nung shilem tejen ka lir. Kar dak tongtoret keta lir, kar dak yimya tajung malitsü, kar teti tembar tajung aser tejangja alitsü. Saka

(Tapak 7 nungi...)

iba ama political engineering yagi tashi maitba party tem raksatsütsü. Iba yagi PTI meraksatsütsü, kong Khan ya par nüburttem den tesendaktep indang indanga lir. PTI tashi tuluba nung arutsü saka democracy raksatsüba aneptsü mapang talangka agitsü," ta pai osangbener dang ashi.

Lahore nung taoba ato kilonser Imran Khan'er kidang army sünga liaka Hokulbarnü Punjab Police dangi par ki mita bushitsü totuyuba aruogo.

Khan'er Zaman park Residence mita bushitsü totuyuba agütsüogo, anungji mapang tatsüka tsüngta Punjab police iba ki tonga arutsü amai lir.

Osang ajanga ashiba agi, iba operation nung Commissioner of Lahore densema lir.

Khan apuba mechi longkak aita sorkar meyong ki o jen raksatsüba nung temolung melemi alir nisung 40 par kidang jenoka aliba ghonda 24 tsüngta agüjang ta ketdangsurtemi totuyuba agüja liasü. Iba totuyuba nung mapang atakzüksüba ya Brestostibar nikongdang 2:00 ako nung tembang aser police temi par ki lungbanger lir.

Africa-i FIFA World Cup 2026 nung asayatsü sentong melenshir

Cape Town, Monupii/May 19 (Agencies): Africa-i FIFA World Cup 2026 asayamung nung shilem agitsü qualification atema single stage benoktsü anungji taoba mapang küm ana jungnüa round asem asaya aruba yimya mamshitsü.

North America nung asayatsü aliba FIFA World Cup 2026 nung team 48 asayatsü aser yangji Africa continent nungi linük toku-i shilem agitetsü aser telok toku aliba format ka yanglutsü lemtetogo aser takok angurtem kisung World Cup nung asayatetsü, ta Confederation of African Football ajanga Hokulbarnü sangdong.

Taoba mapang Africa nung linük pongu qualification atema stage asem liasü - preliminary rounds nung rank tsünglanglen aliba linüktem asayatsü aser iba sülen group stage aser two-legged playoffs asaya liasü.

Taoba küm Qatar nung asayadang African qualifying process ya ita trok asaya liasü saka 2026 atema ita 23 asayatsü aser finalists linük toku ya jangjatetsü.

Telok toku atema draw ya Cotonou, Benin nung July 12 nü asayatsü, ta CAF ajanga ashi.

Iba dak alia tali rasaralema

mashi saka Africa nung aliba linük 54 prongi shilem agitsü imlar, tetetzü group shia linük trok alitsü aser tang tesüsa FIFA rankings nung ajemdaker team tem lemsatsü.

Qualifiers ya November ita tenzüksü aser taruba küm June ita tashi asayatsü aser March, September aser October 2025 nung groups asaya tembangtsü 'windows' temeja asem alitsü.

Group tem nungi tajungtiba runners-up pezü ya November 2025 nung CAF playoff tournament ka asayatsü aser yangji takoker ya Africa nungi slot ter tuba atema March 2026 nung FIFA playoff tournament nung asayatsü.

Iba playoff tournament nung team trok alitsü aser parnok rongnungi World Cup nung asayatsü team ana shimtsü. Team trok ya confederation shia nungi ka-ka alitsü saka Europe nungi malitsü aser iba asayamung ayongba linük nungi team talila ka alitsü.

FIFA World Cup 2026 ya Canada, Mexico aser US nung 2026 küm tiyonglen asayatsü.

Alima nung football ketdangsuba tentet, FIFA ajanga iba asayamung final ya July 19 nung asayatsü ta sangdongogo.

Vincent Kompany-i Burnley den tenangzüktepba yanglushi



asayatsü anunga lia Championship koka liasü.

"Burnley aser Turf Moor na ya tetenzük nungi shitak ta bilem anungji taruba küm pongu atema tenangzüktepba yanglutsü ya kanga dang tim ta bilem," ta taoba Manchester City aser Belgium defender Kompany-i ashi.

"Fan tem den külemi onoki Turf Moor ya tanaben tashi ita kümdaktsüogo tarutsü atema aser jenjang ajak nung Burnley tajungba kümdaktsütsü asoshi yongya atar," ta paisa ashi.

"Vincent-i tenangzüktepba tasen yanglushiba atema kanga pelar. Pa Burnley Football Club tejakdangi anir aotsü asoshi tetemsü lir," ta Burnley mendenbuba Alan Pace-i ashi.

"Pa lenir kanga tajung ka lir aser nükjidong tulu yur pai onok indang club nung onoki ajangzüküba jenjangtem tonga anir," ta paisa ashi.

Burnley puri takok tajung anguba sülen taoba NFL asayar J.J. Watt aser pa kinungtsü Kealia Watt natia club nung invest süogo. Watt ya taoba mapang U.S. international soccer asayar ka liasü.

Monupii/May 19, 2023 (Agencies): Second-tier Championship koka Premier League nung asayatsü asoshi maangka ngutetba sülen Burnley manager Vincent Kompany-i club den tenangzüktepba yanglushiogo aser pai 2028 küm tashi club manager mapa abentsü, ta club sangdong ka ajanga metetdaksü.

Burnley pur season ka sülen tanaben Premier League nung asayatsü atema jenjang ajangzükütetogo. Parnoki asayamung nung asaya ana

BILEMDANGANG

"Nai dang nü taküm melenshitetsü."